



---

Preschentscha in sala      72 votantas e votants

---

## Tractandas

- 1      Tscherna dals scrutinadurs**
- 2      Approvaziun da credits d'investiziun e dal preventiv d'investiziuns cumplessiv per l'on 2018**
- 3      Approvaziun dal preventiv dal quint da success per l'on 2018**
- 4      Approvaziun dal pè d'impostas per l'on 2018**
- 5      Preparaziun e deliberaziun d'üna revisiun da la planisaziun locala**
  - 5.1 Fracziun Lavin - plan da zonas e plan general da fuormaziun in Plans**
  - 5.2 Fracziun Brail - plan da zonas e plan general da fuormaziun in Crusch Plantaun**
- 6      Approvaziun d'ün contrat da concessiun d'aua da fuond in Muglinè a favur da la Terretaz SA**
- 7      Approvaziun d'ün credit supplementar a regard las investiziuns in connex cun la restructuraziun da la Chasa Muglinas a Susch ill'otezza da 67'000 francs**
- 8      Comunicaziuns e varia**
  - 8.1 Infuormaziuns sur da rendaquints da credits approvats**
  - 8.2 Varia**

Il president cumünal Emil Müller salüda a las votantas ed als votants a quista radunanza cumünala. El ha constatà cha la bannida es gnüda protramissa a temp.

El infuorma ch'insebel cul possessur da las parcelas pertoccas in Crusch Plantaun a Brail s'ha decis da strichar quista tractanda da la glista da tractandas. Il possessur e'l cumün voutan preschantar i'l 2018 il proget da revisiun adattà al concept da fabrica plü detaglià co ch'el as preschainta actualmaing. Uschè nu vegn entrà illa tractanda:

Preparaziun e deliberaziun d'üna revisiun da la planisaziun locala

5.2 Fracziun Brail - plan da zonas e plan general da fuormaziun in Crusch Plantaun

Cun quai vain approvada la glista da tractandas.

Ils protocols no. 01/2017 da la radunanza cumünala dals 22 mai 2017 e no. 02/2017 dals 25 gün 2017 sun stats publichats. Cunter la tractanda no. 7 varia da la radunanza dals 22 mai d'eira entrada üna protesta, chi'd es gnüda evasa i'l fratemp cun far ün'aggiunta al protocol e cun publicar la protocollaziun nouva. In seguit nun es entrada ingüna protesta, ne cunter l'aggiunta dal protocol manzunà, ne cunter la protocollaziun da la radunanza cumünala dals 25 gün 2017. Cun quai valan ils protocols sco approvats.

Il preventiv es quel instrumaint cha la votanta e'l votant ha la pussibilità da diriger las autoritats cumünalas. Quist instrumaint ha raggiunt amo plü gronda importanza cun quai cha`ls credits preschantats e sancziunats sur il quint d'investiziun sun eir deliberats e nu vegnan plü preschantats in üna radunanza da credit.

## **1      Tscherna dals scrutinadurs**

Sco scrutinadurs in sala sun gnüts tschernüts Mattias Bulfoni e Jon Andrea Könz.

## **2      Approvaziun da credits d'investiziun e dal preventiv d'investiziuns cumplessiv per l'on 2018**

Il commember da la cumischiun sindicatoria Giancarlo Neuhäusler drizza ün pèr plets a la radunanza cumünala. La cumischiun sindicatoria ha manà tras in lügl ed in october 2017 ün di da controlla. Tanter oter ha ella fat controllas da detagls sün differents secturs ed eir elavurà l'offerta pel nouv post extern da revisiun.

La cumischiun sindicatoria propuona da deliberar il preventiv dal quint da success e dal quint d'investiziun per l'on da gestiun 2018 uschè sco ch'els vegnan preschantats. Eir sustegna ella la proposta a regard il pè d'impostas pel 2018.

La cumischiun sindicatoria ingrazcha fich a tuot las collavuraturas e tuot ils collavuratur, a la direcziun operativa, a la suprastanza cumünala ed al president cumünal per lur grondius ed instancabel ingaschamaint a favur dal cumün da Zernez, cun tuot sias fracziuns.

Il preventiv dal quint d'investiziuns prevezza cuosts da chf 5'630'000 ed entradas da chf 1'985'000. Las investiziuns nettas importan uschea chf 3'645'000. Trat giò il Cashflow da chf 1,93 milliuns resulta ün manco da finanziaziun da raduond chf 1,7 milliuns. Quist manco sto gnir cuvernà cun novs credits da banca.

#### Approvaziun da progets/credits d'investiziun:

- **1610.5000.00**    20'000 chf    **Sanaziun paracullas 300m – progettaziun**
- **1610.5000.01**    600'000 chf    **Sanaziun paracullas Arduond (realisaziun 2018)**
- **1610.5000.01**    20'000 chf    Sanaziun paracullas Arduond (stüdi 2017)
- 1610.6300.00**    300'000 chf (-)    *Contribuziuns federalas*
- **2170.5040.02**    500'000 chf    **Chasa da scoula Zernez – planisaziun renovaziun**
- **3410.5010.60**    115'000 chf    **Plazza da sport e giovar Lavin**
- **5450.5000.00**    60'000 chf    **Local per giuventüna**
- **Sanaziun Suot Baselgia – Viel**    **550'000 chf**
- 6150.5010.06*        *137'500 chf*        *sanaziun via*
- 7101.5031.06*        *55'000 chf*         *sanaziun aua*
- 7201.5032.05*        *247'500 chf*        *sanaziun aua suos-cha*
- 8711.5034.08*        *27'500 chf (-)*     *sanaziun electric*
- 8731.5030.05*        *82'500 chf*         *sanaziun chalur*
- **7201.5032.10**    115'000 chf    **Zernez – sanaziun sarinera**
- **8181.5010.09**    100'000 chf    **Via Ertaset – sanaziun**
- **8181.5010.11**    220'000 chf    **Val Mela (SIE) – sanaziun**
- **8290.5060.80**    100'000 chf    **Prunader (gener Manitou)**
- **8711.5034.05**    500'000 chf    **«EW Süd» – investiziuns i'l provedimaint electric Zernez**  
   **Dumonda per ün credit cumplessiv da 1.85 milliuns francs**
- **8711.5034.06**    110'000 chf    **Spostamaint lingias Scheschna**
- 8711.6370.80*    *80'000 chf (-)*    *Contribuziuns e taxas d'attach (be part Scheschna)*
- **8711.5030.00**    165'000 chf    **Zernez – cabels e cumponentas (part fibr'optica)**
- **8900.5030.00**    175'000 chf    **Fibr'optica Zernez: basa**
- **8900.5030.50**    50'000 chf    **Zernez: cabels e cumponentas (attachs)**
- 8900.6370.00*    *20'000 chf (-)*    *Zernez: taxas attach*

- **6150.5010.04 660'000 chf Muglinè vest – infrastruttura – etappa 1 e 2**  
*6150.6190.80 270'000 chf (-) Restituziun tras terzs*

Discussiuns e dumondas da votantas e votants:

#### **Tempo 30 a Lavin**

Ün votant da Lavin s'indreschischa sur da l'agir pensà da la suprastanza in connex cun ün credit approvà amo da la radunanza cumünala da l'antierur cumün da Lavin. Il president cumünal manzuna d'esser landervia a far masüraziuns da sveltezza e da frequenzas, avant co stuvair proseguir cun scumonds, chi nu's voul far be uschè. La suprastanza cumünala gnarà ad infuormar sur dals resultats.

#### **Plazza da glatsch**

Ün votant as fa la dumonda, schi nu füss plü radschunaivel e da proseguir culla sanaziun da la plazza da glatsch artificial sainza ingaschar a massa blers perits. Il manader respunsabel manzuna chi stuvaran gnir sanadas eir las lingias da glycol insembel culla plazza portanta.

#### **Chasa da scoula Zernez**

Il suprastant respunsabel infuorma d'avair prosegui cul proget da sanaziun da la chasa da scoula. Il proget culla dumonda da credit d'investiziun gnarà preschantà a la radunanza cumünala dals 25-4-2018. In seguit pudarà gnir inizià il proget e manà a fin dal 2021.

Ün votant es da l'avis cha l'agir dal cumün in quist cas es ed es stat ferm cumplichà, cun deliberar credits per provisoriums, cun manar tras progets da pilots e cun far planisaziuns fin a l'infinit.

Il president cuntradischa per part e muossa via a la dumonda e sülla decisiun da la radunanza cumünala correspudenta da nu vulair collavurar sül sector dal s-chalin ot cul Lyceum Alpinum a Zuoz. Quista decisiun es statta decisiva pel futur da quist proget. Il president intuna chi's voul proseguir cun tuotta forza, cun integrar darcheu la Chasa Alossai illa strategia da proseguimaint.

#### **Implant da tir Arduond**

Ün votant es interessà da savair, perche cha'l cumün spenda tanta munaida per la sanaziun dal paracullas in Arduond. Il president cumünal muossa via sül dovair, cha'l cumün ha in similis cas. La società da chatschaders Sarsura Zernez gnarà inchargiada cullas investiziuns i'ls novs paracullas, chi stuvaran gnir installats davo la sanaziun.

#### **Plazza da giovar Lavin**

Sün dumonda d'üna votanta muossa via il president cumünal sün üna cunvegna fingià plü veglia dal cumün oriund da Lavin, cha'l cumün sto resguardar invers il vaschin da la plazza da giovar/sport in connex cun emissiuns da canera.

#### **Localitats per giuventüna e giuvenils**

Ün votant pertoc i'l quartier da la staziun VR resp. da la remissa da la VR (Schuppen RhB) as fa pissers, scha quistas localitats vegnan piazzadas in quist lö. El temma amo daplü emissiuns da canera in quist lö, fingià donnagià cun canera tras la viafier retica, restaurants e bars. El propuonna cha oters quartiers dessan gnir inchargiats quista vouta cun emissiuns, per exaimpel cun dovrar la Chasa Alossai, la chasa da scoula a Susch, las localitats da l'antieriura centrala da s-chodamaint in Cul obain i'l arsenal a Lavin.

Il president cumünal e'l suprastant respunsabel muossan via, cha la remissa da la VR saja üna varianta chi's vaiva evaluà. Üna conferma da la VR a Cuaira nu s'ha amo in chasa. Il lö füss però ideal, resguardand la spüerta dal trafic public etc.. Üna varianta implü füss il chasin d'immundizchas in vicinanza.

Da la fich gronda e vasta discussiun resulta il sustegn fundamental da spordscher üna vouta eir a la giuventüna indigena üna località per lur adöver ed als giuvenils üna località per as chattar, accompagnada tras üna persuna perita. Il lö e la structura organisatorica nu sun però amo clers e ston gnir reponderats.

Chi regna ün fich grond bsögn para d'esser incontestà, tenor ils blers votums da las votantas e dals votants. Al votant inquiet imprometta il president cumünal ün appuntamaint bilateral.

**Rait electrica Zernez – proget EW süd**

Sün dumonda d'ün votant, scha quist'investiziun renda, po il manader dal EW Zernez respunder cun congualar l'otezza da l'investiziun (1,85 miu.) invers las sortidas chi's po spagnar ed entradas novas chi's po generar (0,1 miu.) per on. Ün oter votant sustegna quist proget, cun render attent cha la stabilità da la furniziun da forz'electric a Brail nu saja actualmaing uschè buna.

**Tualettas publicas pro las baselgias evangelicas Zernez****Proposta**

**Aint il preventiv dal quint d'investiziuns dess gnir tut sü ün import da 111'000 chf per fabricar üna tualetta pro las baselgias da Zernez.**

Ün votant incumbenzà ha fat quista proposta cun muossar via sülla mancanza d'üna simla spüerta in vicinanza da las duos baselgias evangelicas a Zernez. Tenor el sun ils bsögns gronds e d'interess public. Ün seguond votant manzuna, chi's pudess forsa adattar il lö e'ls cuosts dal fabricat. Eir as pudess dovrar la tualetta per giasts chi van in tura/a spass sü da Viel (Munt Baselia).

Il president cumünal infuorma a la radunanza d'avair sbüttà la dumonda d'investiziun fingià in direcziun operativa ed in suprastanza. Ils motivs principals sun stats ils cuosts ots, l'adöver redot, las difficultats da stuvair resguardar la ledscha d'impedit, ma impustüt cun resguardar ils cuosts annuals ch'ün simla tualetta chaschuna al cumün. Vuschs plü criticas as dumondan, scha'ls bsögns sun avantman eir a Susch e Lavin.

Davo üna vasta discussiun cun vuschs per e cunter la proposta resulta ün'otra proposta d'ün votant, chi dess incumbenar las instanzas cumünalas d'elavurar ün proget cun variantas cun muossar via sün cuosts d'investiziun e da gestiun e da manar quellas variantas in üna prosma radunanza cumünala.

**La radunanza cumünala es seguida cun 37 vuschs cunter 19 vuschs a quista proposta. Cun quista decisiun nu s'ha plü stuvü decider sur da la proposta oriunda fatta in connex cul credit d'investiziun da 111'000 chf.**

**In üna prüma votaziun finala ha la radunanza cumünala approvà cun unanimità da vuschs ils singuls credits d'investiziun sco gnüts preschantats i'l preventiv dal quint d'investiziun 2018. Cun quista decisiun es dat glüm verda a la realisaziun dals progets.**

**In üna seguonda votaziun finala ha la radunanza cumünala approvà cun unanimità da vuschs il preventiv dal quint d'investiziuns 2018 preschantà.**

**3 Approvaziun dal preventiv dal quint da success per l'on 2018**

Il manader da finanzas ha preschantà il preventiv dal quint da success chi prevezza cun sortidas da chf 17'981'200 ed entradas da chf 18'424'200 ün guadagn da chf 443'000. Ils augmaints marcants da cuosts i'l quint da success invers il preventiv 2017 sun principalmaing pro las amortisaziuns chi s'augmaintan per chf 165'000. Implü sto nouv gnir manà il register da datas da planisaziun chi'd es previs cun chf 29'000 (1400.3131.00). Sü'l sector da scoula s'haja pudü diminuir ferm ils cuosts dal s-chalin ot (2130.\*), l'introducziun dal PI21 chaschuna però da tschella vart cuosts considerabels aint l'infrastructura electronica (2190.3153.00). Implü sto il Cumün da Zernez cumprar accias dal IOF per chf 28'000 (2510.3118.00). E lura vegnan nouv manats ils cuosts per „rimplazz. da vascas da serra“, „rimplazz. da cabinas da scumpart“, „mantegniment da l'iglüminaziun publica“ e la „planisaziun locala“ sur il quint da success. Fin uossa giaivan quists cuosts sur il quint d'investiziuns (total chf 250'000/on).

I'l quint da success sun previsas amortisaziuns dad chf 1'078'100 e deposits a las finanziaziuns specialas da chf 413'300. Il guadagn implü las amortisaziuns e'l müdamaint da las finanziaziuns specialas fuorman il Cashflow chi importa previsibelmaing chf 1'934'400.

Il preventiv da success es ün instrumaint da lavur impegnativ per la direcziun operativa, sco eir per tuot las collavuraturas e collavuratur. La gestiun finanziaria dal Cumün da Zernez vain manada tenor quist preventiv e resguardand las competenzas finanzialas dals singuls gremis.

Ün votant s'indeschischa sur da l'expensa da 20'000 chf per ün stüdi da sanaziun da la chasa da pravenda in Runatsch. Quistas expensas sun pensadas, per sclerir cuosts ed agir in connex culla sanaziun, eir energetica, da quista chasa chi sta suot protecziun da monumaints.

Üna votanta as dumonda, perche chi's voul sustgnair l'event „Diagonela“ a Zuoz, ma il runal da skis per uffantins a Lavin brich.

Il coordinatur turistic muossa via sün l'importanza da collavurar cun cumüns vaschins sül sector turistic, ma eir sül fat, cha'l cumün ha pajà l'investiziun dal runal e ch'el contribuisscha fich bier sül sector da la comunicaziun da quista spüerta.

**La radunanza cumünala ha approvà cun unanimità da vuschs il preventiv dal quint da success 2018 preschantà.**

#### **4 Approvaziun dal pè d'impostas per l'on 2018**

Il pè d'impostas actual es pro 84% da l'imposta chantunala. Reguardond la situaziun finanziaria actuala nu daja pel mumaint motivs per augmentar o per redüer il pè d'impostas.

**La radunanza cumünala ha approvà sainza cuntravusch il pè d'impostas dad 84% per l'on 2018.**

#### **5 Preparaziun e deliberaziun d'üna revisiun da la planisaziun locala**

##### **5.1 Fracziun Lavin - plan da zonas e plan general da fuormaziun in Plans**

Per pudair pussibiltar als possessurs da las parcelas no. 3251 e 3253 in Plans a Lavin (famiglia Padrun) la realisaziun d'ün annex a la stalla s'ha vulgü e stuvü instradar sün dumonda üna pitschna revisiun da la planisaziun locala in quist lö. I's tratta d'ün proget da planisaziun plü pitschen, chi sto passar divers pass da planisaziun. La revisiun manzunada es statta publichada dals 31 october fin als 30 november 2017. Dürant quist temp nu sun entradas ingünas dumondas d' intervenziun. Ushè chi's po proseguir culla dumonda da preparaziun e da deliberaziun tras la radunanza cumünala a man da la votaziun a l'urna, chi'd es previsa pels 4 favrer 2018. In absenza dals pertocs ha

**la radunanza cumünala decis cun unanimità da vuschs d'inviar quista revisiun da la planisaziun locala sco preschantada e sainza adattamaints a la votaziun a l'urna chi varà lö i'l 2018 cun la proposta d'approvar tala.**

#### **6 Approvaziun d'ün contrat da concessiun d'aua da fuond in Muglinè a favur da la Terretaz SA**

La firma Terretaz SA ha fat als 30 gün 2017 la dumonda da pudair retrar aua da fuond in Muglinè per realisar ün indriz per s-chodar e per l'aua choda per la halla nouva in Muglinè. I's tratta d'üna pompa chi retira maximalmaing 320 liters per minuta. Simlas concessiuns sun gnüdas concessas a privats i'ls quartiers da Ruzön e da Cul. Il contrat da concessiun ha üna dürada da 25 ons e prevezza üna indemnizaziun unica da 500 francs ed üna taxa da concessiun annuala da 200 francs.

Ils puncts principals da quist contrat da concessiun as basan sün ün contrat da muostra da dret da concessiun surtut dal uffizi chantunal d'energia AFE GR.

**La radunanza cumünala ha approvà cun unanimità da vuschs il contrat da concessiun sco preschantà.**

## **7 Approvaziun d'ün credit supplementar a regard las investiziuns in connex cun la restructuraziun da la Chasa Muglinas a Susch ill'otezza da 67'000 francs**

La radunanza cumünala dals 30 november 2015 vaiva deliberà il credit ill'otezza da chf 250'000 per restructurar la Chasa Muglinas a Susch in localitats per la scoula da pedagogia curativa (HPS). In connex culs sclerimaints da l'indschegner regard la foura pel ascensur e diversas pitschnas perforaziuns d'ürant la fabrica ha tal constatà, chi'd es gnü fat müdamaints considerabels vi da la structura portanta pro l'ultima restructuraziun al mumaint chi'd es gnü realisà il Center cumünal Muglinas (CCM). Ün prüm güdicat sül lö da l'indschegner ha muossà, cha pro quist abitacul nun es plü dat la sgürezza da portada tenor la norma SIA 261: 2014 resp. las normas regard la sgürezza cunter terratrems. Fingià pro l'ultima restructuraziun vess stuvü gnir tut resguard sün quistas normas, quai chi nun es però gnü fat. Quist fat nu d'eira consciant als respunsabels cumünals.

Tenor l'indschegner incumbenzà es stat indispensabel da refar darcheu las parts da beton e da far tscherts lavurs per darcheu metter ad ir la structura portanta da möd chi po gnir tgnü aint las normas actualas correspudentas, impustüt causa chi's tratta in quist cas d'ün edificaziun chi vain dovrà pel public. Tenor üna prüm survista vaiva calculà l'indschegner cuosts implü da chf 70'000, effectiv sun stat tals chf 61'012.75. Il fabricat oriund sco tal ha cuostü chf 5'602.55 daplü co previs, uschè chi's sto constatar ün surpassamaint dal credit da chf 66'615.30.

Perquai es stat da preschantar quist surpassamaint da cuosts resp. dal credit sco dumonda da credit supplementar (Nachtragskredit).

**La radunanza cumünala ha approvà cun unanimità da vuschs il credit supplementar sco preschantà.**

## **8 Comunicaziuns e varia**

### **8.1 Infurmaziuns sur da rendaquints da credits approvats**

#### **8.2 Varia**

Tenor HRM2 es il cumün in dovair da preschantar al suveran ils rendaquints da credits approvats in simla fuorma. La supranza cumünala ha decis da vulair far quai, scha mà pussibel, adüna illa radunanza cumünala da preventiv.

### **0290.5040.02 65'000 chf Cul – büro gestiuns tecnicas**

Causa mancanza da piazza i'l Center cumünal e per avair tuot las partiziuns da las gestiuns tecnicas in ün lö, s'haja decis da transferir il büro da l'uffizi da fabrica il edificaziun da gestiun in Cul. D'ürant l'inviern 2016/17 ha pudü gnir fabrichà oura il local/magazin sur la garascha da la gruppa da lavur sco nouv büro pel uffizi da fabrica e'l secretariat per las gestiuns tecnicas. Il proget es serrà giò ed ils cuosts totals s'amuntan a chf 61'225.00, dimena chf 3'775.00 obain -5.81% damain sco previs.

### **1500.5060.00 400'000 chf Rimplazzamaint autocisterna (TLF)**

#### **1500.6310.00 120'000 chf (-) Contribuziuns GVG GR**

L'autocisterna (TLF) es gnü furni da la firma Rosenbauer AG als 12 avuost 2017. In ün pitschen act d'inauguraziun han ils pumpiers insembel culla populaziun pudü tour incunter quist veicul. Ils cuosts finals s'amuntan a chf 379'844.70. Il credit es gnü suotpassà per -20'155.30 chf obain per -5.04 %. Las contribuziuns da la GVG GR s'amuntan a chf 94'927.00.

### **7101.5031.30 70'000 chf Punt' Ota – vasca da colliaziun Brail – Cinuos-chel**

#### **7101.6310.80 10'000 chf (-) Restituziuns federalas e chantunalas**

La lingia d'aua da l'inchaschamaint fin pro'l reservuar Punt Ota es ca. 80 ons veglia e per part in ün nosch stadi. Il cumün ha gnü da far impissamaints sco chi's pudess furnir l'aua per la fracziun da Brail, in ün cas cha quella lingia stuvesse gnir tutta our'd funcziun p. ex. in cas d'üna ruottadüra. La soluziun es stat la fabrica d'üna vasca da sviamaint chi permetta da sviar l'aua da Cinuos-chel. Il proget es serrà giò ed ils cuosts totals

s'amuntan a chf 74'239.80, dimena chf 4'239.80 obain + 6.06% sur l'import previs. Davart dal Chantun sun gnüdas aint contribuziuns sco previsas da chf 10'000.

**7900.5090.00 33'000 chf Muglinè – planisaziun da quartier**

La planisaziun da quartier Muglinè es gnüda iniziada dal 2010 sün squitsch dal Chantun. Als 12 october 2015 ha la suprastanza cumünala pudü decretar il plan da quartier. Las lavurs han dürà passa 7 ons. Dürant quist lung temp s'ha adüna darcheu adattà la planisaziun, per part eir a basa da recuors chi sun entrats. Trais voutas s'ha publichà las actas publicamaing. Planisaziun, cusglianzas da perits, recuors, mutaziuns da terrain etc. han tanter oter chaschunà cuosts na previsibels. Ils cuosts finals manzunats s'amuntan a chf 155'260. Als 13 marz 2017 ha la suprastanza cumünala lura pudü decretar il scumpart da cuosts da la part planisaziun e mutaziuns da terrain. Las contribuziuns dals possessurs pertocs da la planisaziun da quartier s'amuntan a chf 108'682. Cun quai s'amuntan ils cuosts nets da planisaziun e da mutaziuns da terrain a charg dal cumün a chf 46'578. Il credit es gnü surpassà per chf 13'578 obain per 41.15%.

**8110.5000.60 95'000 chf Gonda-Curtins – spalüdamaint vias e prada**

Las lavurs sun gnüdas realisadas dal 2016 e gnüdas finidas giò in prümavaira 2017. La lingia existenta da tubs da PVC es gnüda rimplazzada cun tubs PE. Implü es gnü construi lung la via da god üna drenascha da ca. 180 m lunghezza. Uossa es la via sütta e darcheu transibla. Il proget es serrà giò ed ils cuosts totals s'amuntan a chf 89'820.07, dimena chf -5'179.93 obain -5.45% suot il credit concess.

**8180.5040.60 100'000 chf Alp Zeznina - renovaziun**

L'Alp Zeznina a Lavin ha pudü gnir renovada d'urant la stà 2016 uschè sco previs. Id es gnü rimplazzà las fanestras la cuvrada dal tet e fabrichà aint üna tualetta cun ün tanc extern sco eir ün nouv indriz solar. Il proget es serrà giò ed ils cuosts s'amuntan a chf 91'472.95, dimena chf -8'527.05 obain -8.53% suot ils cuosts previs.

**8180.5040.61 50'000 chf Marangun da Lavin - sarinera**

La tualetta pella chamonna dal Marangun da Lavin ha pudü gnir construida sur il quint da success. Is ha tschernü ün tip da tualetta sütta. Il proget es serrà giò ed ils cuosts totals per quista realisaziun s'amuntan a raduond 8'000 chf (Kompotoi AG: chf 4'820; HeliBernina AG: chf 749.75; cuosts interns d'installaziun: chf 2'500). La tualetta es gnüda construida d'instà 2017. **Il credit d'impegn vain quattras scholt.**

**8181.5010.00 200'000 chf Punt Güstizia – punt nouva**

La punt da la Güstizia es gnüda realisada dal 2016 tenor la progettaziun dal 2014. Pitschens adattamaints sun gnüts realisats e finits giò da prümavaira 2017, uschè cha in avuost 2017 ha pudü gnir la punt nouv construida inaugurada insembel cun ün cult divin cumünaivel. Il proget es serrà giò ed ils cuosts totals s'amuntan a chf 199'699.75, dimena chf -300.25 obain -0.16% suot il credit concess.

**Varia:**

**Via Surpunt a Susch**

Üna votanta fa pissers per la situaziun actuala privlusa sün via in connex cullas fabricas da tuottas duos varts da la via in Surpunt. Il president muossa via cha la situaziun es propcha pac buna e cha la patruna da fabrica dals plazzals da fabrica privats es in dovair da refer la via in perfet bun stadi.

Il president cumünal ingrazcha als preschaints per la cumparsa e per l'interess demuossà, giavüscha a tuots inavant ün bel temp d'Advent ed invida ad ün aperitiv.

Dürada da la radunanza:  
20:00h fin 22:40h

Il president  
Emil Müller



Il chanzlist  
Corsin Scandella

Publicaziun dal protocol:  
6 favrer 2018 fin 8 marz 2018.

Protestas cunter quist protocol sun d'inoltrar in scrit fin als 8 marz 2018 a la suprastanza cumünala dal Cumün da Zernez.